

Kata Kunci:
Soleh / Baik
Pengaruh
Sahabat / Kawan



Majlis Ugama Islam Singapura
Khutbah Jumaat
17 Oktober 2025 / 25 Rabiulakhir 1447H
Nilai Persahabatan yang Baik

اَلْحَمْدُ لِلّٰهِ الَّذِي هَدَانَا لِهٰذَا وَمَا كُنَّا لِنَهْتَدِيَ لَوْلَا اَنْ هَدَانَا اللّٰهُ، وَاشْهَدُ
اَنْ لَا اِلٰهَ اِلَّا اللّٰهُ وَحْدَهُ لَا شَرِيكَ لَهُ، وَاشْهَدُ اَنَّ سَيِّدَنَا مُحَمَّدًا عَبْدُهُ وَرَسُولُهُ.
اَللّٰهُمَّ صَلِّ عَلٰى سَيِّدِنَا مُحَمَّدٍ وَعَلٰى اٰلِهِ وَاَصْحَابِهِ اَجْمَعِينَ. اَمَّا بَعْدُ، فَيَا
عِبَادَ اللّٰهِ، اَوْصِيْ نَفْسِيْ وَاَيُّكُمْ بِتَقْوٰى اللّٰهِ عَزَّ وَجَلَّ، فَقَدْ فَازَ الْمُتَّقُونَ.

Zumratal mukminin rahimakumullah,

Marilah kita tingkatkan ketakwaan kita kepada Allah s.w.t. dengan melaksanakan segala perintah-Nya dan menjauhi segala larangan-Nya. Ayuh, kita dampingi hamba-hamba Allah yang **soleh**, agar kita lebih bersemangat untuk meningkatkan ketaatan dan ketakwaan. Semoga Allah s.w.t. memelihara setiap **persahabatan** yang **baik** lagi **soleh** serta menghimpunkan kita di dalam syurga-Nya. Amin, ya Rabbal 'Alamin.

Jemaah yang dirahmati Allah,

Siapakah **kawan baik** kita? Dan siapakah yang layak dijadikan **kawan baik**? Mungkin ada yang terbayang raut wajah rakan

sekerja, atau teman sedarjah atau sekolah, mahupun mereka yang berkongsi minat yang sama, dan begitulah seterusnya.

Percayakah anda jika saya katakan ada segolongan manusia yang **bersahabat** di dunia, tetapi mereka akan bermusuhan di hari akhirat nanti? Yakni seolah-olah mereka merasa kesal bersahabat dengannya.

Saudaraku, sila dengarkan firman Allah s.w.t. dalam Surah Az-Zukhruf, ayat 67:

الْأَخِلَاءُ يَوْمَئِذٍ بَعْضُهُمْ لِبَعْضٍ عَدُوٌّ إِلَّا الْمُتَّقِينَ ﴿٦٧﴾

Yang bermaksud: “Pada hari itu, **sahabat-sahabat** karib sesetengahnya akan menjadi musuh kepada yang lain, kecuali orang-orang yang **persahabatannya** berdasarkan takwa (yakni iman dan amal **soleh**).”

Ternyata, soal **berkawan** yang kadangkala kita anggap remeh mempunyai kesan yang mendalam dalam kehidupan seorang Muslim. Dalam erti kata lain, **sahabat** yang **baik** adalah sahabat yang mementingkan ketakwaan dan kebaikan; yang suka berbuat **baik** dan sering mendorong kita ke arah yang sama.

Sidang Jumaat yang dikasihi Allah,

Junjungan kita Nabi Muhammad s.a.w. pernah bersabda yang bermaksud:

*“Seseorang itu mengikut agama (cara hidup) **sahabatnya**. Maka hendaklah kamu perhatikan dengan siapa kamu **bersahabat**.”*
(Riwayat Abi Dawud)

Rasulullah s.a.w. memperlihatkan kaitan yang jelas antara **persahabatan** dan perihal agama seseorang. **Persahabatan** dan persekitaran sosial kita boleh **mempengaruhi** pengamalan agama dan cara kehidupan kita. Saya yakin ramai antara kita memahami realiti ini. Oleh itu ikutilah pesanan khutbah hari ini dengan hati yang terbuka. Dengan mengambil iktibar daripada ayat serta hadis yang dibacakan tadi, izinkan saya berkongsi tiga petua dalam bersahabat mengikut neraca Islam:

Pertama: Mengenal pasti pengaruh baik dan buruk

Kita perlu bertanya pada diri sendiri: Adakah seorang **sahabat** itu mendekatkan kita kepada Allah, atau menjauhkan kita daripada-Nya? Ya saudaraku, soalan ini sesuai ditanya oleh segenap lapisan usia, baik yang muda mahupun yang lebih dewasa.

Pada hari ini, **persahabatan** juga terjalin di alam maya - seperti di wadah-wadah media sosial dan kumpulan komunikasi dalam talian (*group chat*), yang datang bersamanya **pengaruh** yang tersendiri. Kita hendaklah menjauhi **pengaruh** yang berbau dosa seperti menyebarkan gosip atau berita yang tidak sahih, atau memandang remeh pada perbuatan berdosa. Sebaliknya, apabila kita mengenalpasti dan mendekati **pengaruh** yang baik,

kita akan turut terbentuk dengannya. Nabi s.a.w. menyamakan **sahabat** yang baik seperti penjual minyak wangi – kita pasti akan turut mengecap haruman kebbaikannya.

Kedua: Menjadi contoh persahabatan yang soleh dalam kehidupan kita

Sehubungan dengan ini, kita juga perlu bertanya pada diri sendiri dengan insaf: Adakah kita sendiri menjadi pengaruh yang mengajak rakan-rakan menjadi insan yang **soleh**? Atau, adakah kita menjadi penyebab **kawan-kawan** terjerumus ke kancah maksiat?

Saudara sekalian, sebagaimana kita ingin terdedah kepada **pengaruh** yang baik, kita juga sewajarnya menjadi pemangkin aura positif dalam **persahabatan**. Marilah bersama kita menjadi individu yang membantu menguatkan iman **sahabatnya**, menerusi akhlak mulia, berlapang dada, bersikap empati, mendengar tanpa menghukum dan memberi sokongan ketika **sahabat** kita diuji dan memerlukan pertolongan.

Kita menegur dengan penuh hikmah dan kasih sayang. Kita bukan sekadar menjadi **teman** berbual dan bersenda, tetapi juga **teman** yang bersama mendorong, menuju ke syurga.

Ketiga: Sertailah persekitaran yang menyuburkan persahabatan yang soleh

Kita juga mesti mencari peluang untuk menjalin **persahabatan** yang **soleh** – pertalian yang membina kerohanian mukmin, sama ada menerusi amal ibadah, atau kuliah-kuliah agama dan seumpamanya. **Persahabatan** sebegini merangkumi juga saling mengingatkan akan tanggungjawab sivik seperti aktiviti kebajikan atau kerja-kerja sukarela dalam masyarakat dan lain-lain.

Saudaraku,

Pastinya, apabila kita dikelilingi **sahabat** yang ikhlas dan sama-sama berusaha ke arah **kebaikan**, kita akan lebih mudah beristiqamah dalam amalan soleh.

Pada masa yang sama, sekiranya ada di antara **sahabat** kita yang pernah melakukan kesilapan dan mula menunjukkan tanda-tanda untuk berubah, maka bantulah dan sokonglah mereka. Pimpinlah mereka menuju rahmat Allah dengan penuh ihsan, kerana Rasulullah s.a.w. pernah berpesan yang bermaksud: *“Barangsiapa yang menunjukkan arah kebaikan, maka baginya pahala seperti orang yang melakukannya (kebaikan tersebut)”* (Riwayat Muslim)

Sidang hadirin,

Persahabatan yang **baik** bukan sekadar menjalin hubungan persaudaraan dengan siapa yang kita suka, tetapi siapa yang membantu kita menjadi hamba yang disukai Allah dan di redai-Nya. Marilah kita bersama menjadi **sahabat** yang

mengingatkan, bukan sekadar menghiburkan; yang saling menasihati, bukan yang saling menjatuhkan atau menghakimi.

Mudah-mudahan, setiap **persahabatan** yang kita jalin di dunia ini menjadi **persahabatan** yang kekal abadi. Semoga Allah s.w.t. menjadikan kita dalam kalangan orang yang **bersahabat** atas dasar takwa, saling menguatkan dalam **kebaikan** dan mendapatkan keredaan Ilahi. Amin, ya Rabbal 'Alamin.

أَقُولُ قَوْلِي هَذَا وَأَسْتَغْفِرُ اللَّهَ الْعَظِيمَ لِي وَلَكُمْ، فَاسْتَغْفِرُوهُ إِنَّهُ هُوَ الْغَفُورُ
الرَّحِيمُ.

Khutbah Kedua

الْحَمْدُ لِلَّهِ حَمْدًا كَثِيرًا كَمَا أَمَرَ، وَأَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَأَشْهَدُ أَنَّ سَيِّدَنَا مُحَمَّدًا عَبْدُهُ وَرَسُولُهُ. اللَّهُمَّ صَلِّ وَسَلِّمْ عَلَى سَيِّدِنَا مُحَمَّدٍ وَعَلَى آلِهِ وَأَصْحَابِهِ أَجْمَعِينَ. أَمَا بَعْدُ، فَيَا عِبَادَ اللَّهِ، اتَّقُوا اللَّهَ تَعَالَى فِيمَا أَمَرَ، وَانْتَهُوا عَمَّا نَهَاكُمْ عَنْهُ وَزَجَرَ.

أَلَا صَلُّوا وَسَلِّمُوا عَلَى النَّبِيِّ الْمُصْطَفَى، فَقَدْ أَمَرَنَا اللَّهُ بِذَلِكَ حَيْثُ قَالَ فِي كِتَابِهِ الْعَزِيزِ: إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ يَا أَيُّهَا الَّذِينَ ءَامَنُوا صَلُّوا عَلَيْهِ وَسَلِّمُوا تَسْلِيمًا. اللَّهُمَّ صَلِّ وَسَلِّمْ وَبَارِكْ عَلَى سَيِّدِنَا مُحَمَّدٍ وَعَلَى آلِ سَيِّدِنَا مُحَمَّدٍ.

وَارْضَ اللَّهُمَّ عَنِ الْخُلَفَاءِ الرَّاشِدِينَ الْمُهَدِّينَ سَادَاتِنَا أَبِي بَكْرٍ وَعُمَرُ وَعُثْمَانُ وَعَلِيٌّ، وَعَنْ بَقِيَّةِ الصَّحَابَةِ وَالْقُرَآةِ وَالتَّابِعِينَ، وَتَابِعِي التَّابِعِينَ، وَعَنْ مَعَهُمْ وَفِيهِمْ بِرَحْمَتِكَ يَا أَرْحَمَ الرَّاحِمِينَ.

اللَّهُمَّ اغْفِرْ لِلْمُؤْمِنِينَ وَالْمُؤْمِنَاتِ، وَالْمُسْلِمِينَ وَالْمُسْلِمَاتِ، الْأَحْيَاءِ مِنْهُمْ وَالْأَمْوَاتِ. اللَّهُمَّ ادْفَعْ عَنَّا الْبَلَاءَ وَالْوَبَاءَ وَالْمُؤَلَّازِلَ وَالْمَحَنَ، مَا ظَهَرَ مِنْهَا وَمَا بَطَنَ، عَنِ بَلَدِنَا خَاصَّةً، وَسَائِرِ الْبُلْدَانِ عَامَّةً، يَا رَبَّ الْعَالَمِينَ. اللَّهُمَّ أَنْصُرْ إِخْوَانَنَا الْمُسْتَضْعِفِينَ فِي عَزَّةٍ وَفِي فَلَسْطِينَ وَفِي كُلِّ مَكَانٍ عَامَّةً، يَا أَرْحَمَ الرَّاحِمِينَ. اللَّهُمَّ بَدِّلْ خَوْفَهُمْ أَمْنًا، وَحُزَنَهُمْ فَرَحًا، وَهَمَّهُمْ فَرَجًا، يَا رَبَّ الْعَالَمِينَ. اللَّهُمَّ اكْتُبِ السَّلَامَ وَالسَّلَامَ وَالْأَمْنَ وَالْأَمَانَ

لِلْعَالَمِ كُلِّهِ وَلِلنَّاسِ أَجْمَعِينَ. رَبَّنَا آتِنَا فِي الدُّنْيَا حَسَنَةً، وَفِي الْآخِرَةِ حَسَنَةً،
وَقِنَا عَذَابَ النَّارِ.

عِبَادَ اللَّهِ، إِنَّ اللَّهَ يَأْمُرُ بِالْعَدْلِ وَالْإِحْسَانِ وَإِيتَاءِ ذِي الْقُرْبَى، وَيَنْهَى عَنِ
الْفَحْشَاءِ وَالْمُنْكَرِ وَالْبَغْيِ، يَعِظُكُمْ لَعَلَّكُمْ تَذَكَّرُونَ، فَادْكُرُوا اللَّهَ الْعَظِيمَ
يَذْكُرْكُمْ، وَاشْكُرُوا عَلَى نِعَمِهِ يَزِدْكُمْ، وَاسْأَلُوهُ مِنْ فَضْلِهِ يُعْطِكُمْ، وَلَذِكْرُ
اللَّهِ أَكْبَرُ، وَاللَّهُ يَعْلَمُ مَا تَصْنَعُونَ.